



**Inatsisartunut ilaasortaq Aqqalu C. Jerimiassen, Atassut
/-Maani**

**Nipilersortartut eqqumiitsuliortullu akileraartinneqartarnerat pillugu § 37
naapertorlugu apequteqaat nr. 103-mut akissuteqaat**

Brevdato: 24-08-2021
Sags nr. 2021 - 14288

Asasara Aqqalu C. Jerimiassen,

Inatsisartut suleriaasianni § 37, imm. 1 naapertorlugu eqqumiitsuliornermik sulisut akileraartinneqartarnerat pillugu Naalakkersuisunut apequteqarputit. Apequteqaat uannut akisassanngorlugu innersuunneqarpoq.

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

Ajuusaarutigaa kingusinaarlunga akissuteqarama.

Tulliuttuni apequtit ilanngunneqarput aammalu ataasiakkaarlugit akineqarlutik.

1. Eqqumiitsuliortunut akileraartarnikkut oqilisaassinissamik Naalakkersuisut qanoq pilersaaruteqarpat?

Apequt 1-mut akissut:

Eqqumiitsuliornermik suliaqarnermik immikkut sammisumik akileraartarnikkut oqilisaassisoqarnissaanik Naalakkersuisut pilersaaruteqanngillat, Naalakkersuisut isumaqarmata kikkut tamarmik isertitaminnik naligiissumik akileraartussaasut, apequtaatinnagu eqqumiitsuliortutut, aalisartutut imaluunniit eqqiaasutut inuussutissarsiorneq.

Pisortat eqqumiitsuliortunut ikiorsiinerat akileraartarnikkut aqqissuussineq aqqutigalugu ingerlanneqartariaqanngikkaluarpoq, kisiannili aningaasanut inatsimmi tapiissutitut aningaasaliissutit aqqutigalugit ingerlanneqartariaqarluni, nunatta karsiani aningaasaatit saqqumisumik ammasumillu tullerriiaarneqarnerannut ilaatilugit. Akileraartarnikkut aqqissuussineq aqqutigalugu eqqumiitsuliornermik suliaqarnermut tapiissuteqartarneq taamatut tapiissuteqartarnermi aningaasartuutiviit innuttaasunut politikikkullu aalajangiisartunut ersikkunnaarsinneqartarput taamaattumillu ersarissumik inassutigineqarsinnaanani.

Namminersorlutik Oqartussat eqqumiitsuliorneq eqqumiitsuliortullu assigiinngitsorpasuartigut tapersorsorpaat. Tamanna ilaatigut pisarpoq tapiissuteqartarnikkut aningaasaliissuteqartarnikkullu kiisalu kulturikkut aqqissuussinernut assigisaannullu tapiissuteqartarnikkut.

Ukiuni tulliuttuni tamakkiisumik isigisumik kulturikkut politikimik Inatsisartut susassaartullu suleqatigalugit suliaqarnissamut Naalakkersuisut qilanaarput.

2. Suut pitsaaqutaappat nipilersortartooq suliffeqarfimmiit aningaasarsiasat A-indkomstitut inissisimappata ukununga:

a. Nipilersortartunut

b. Namminersorlutik Oqartussanut

Apeqqu 2 a-mut akissut:

Aningaasarsiat A-nut suliffeqarfik imaluunniit suliffeqarfik pisortanit pigineqartooq assigisaalu aningaasarsiaqartitsisoq, pisussaavoq akissarsianit aningaasarsiat A-nik unerartitsinissamut pisussaavoq.

Taamaasilluni nipilersortartooq aningaasarsiami akileraarutaanik nalunaarsuinissamut akiliuteqarnissamullu suliaqarnissaagaluaminut pinngitsoorluni. Tassuunakkut aamma nipilersortartup pisortanut akileraarutitigut akiitsoqalernissaagaluanut aarlerinaatit millisinneqassapput.

Aningaasarsiat akileraaruserneqarnissaannut naatsorsuineri aningaasarsiat A-t B-llu naligiimmik akileraaruserneqartarput, taamaattoq aningaasarsiat B-t akileraarutigineqartussaannngitsut ukiumut 5.000 kr.-upput. A-mik B-millu aningaasarsiaqartut § 24 naapertorlugu akileraartarnikkut ilanngaammik tunineqarsinnaatitaapput.

Apeqqu 2 b-mut akissut:

Unerartitsisussaataaneq qitiuvoq akileraartarnikkut aningaasarsiat eqqortumik suliarineqarnissaat qulakkeerniarlugu, tassami akissarsiat akileraarutaasa annertussusissaat, nalunaarutigineqarnissaat aammalu akiliutigineqarnissaat tassuunakkut qulakkeerneqartarmat.

Unerartitsisussaataasut akileraarutini A-nit akiliuteqarsimannngippata, Akileraartarnermut Aqutsisoqarfiup akileraarutit A-t akilernerqarsimannngitsut unerartitsisussaataasumut akilertinnissaannut malersuisinnaavoq.

3. Suut ajoqutaasinnaappat nipilersortartooq suliffeqarfimmiit aningaasarsiat A-indkomstitut inissisimappata ukununga:

a. Nipilersortartunut

b. Namminersorlutik Oqartussanut

Apeqqu 3 a-mut akissut:

Akileraartussaataasup isertitaminut aningaasarsianut B-nut akileraarutaasussaannngitsut 5.000 kr.-t ilanngaatisinnaannngilai, taakku allatigut aningaasarsianut atornerqarsimannngippata aammalu pineqartup aningaasarsiai inummut nalinginnaasumillu ilanngaat sinnersimappassuk.

Tamatuma saniatigut tamanna ajoqutaasutut isigineqanngilaq, tassami qulakkeerneqaannartussaammat akissarsiat akileraaruserneqarsimanissaat.

Apeqqu 3 b-mut akissut:

Aaqqissuussineq Namminersorlutik Oqartussanut ajoqutaanngilaq.

4. Inatsisiliornikkut suut allannguutaasariaqarpat nipilersortartut isertitaat B-indkomstitut nalunaarsorneqarsinnaalissappata?

Allannguinermi aningaasatigut qanoq kinguneqassappat ukununga:

- a. Pisortanut**
- b. Namminersortunut**
- c. Innuttaasunut**

Apeqquut 4-mut nipilersortartut isertitaat B-tut nalunaarsorneqarsinnaalissappata inatsisiliornikkut suut allannguutaasariaqarnersut pillugit akissut:

Aningaasarsiat A-junersut imaluunniit B-iunersut pillugit isertitap suunera aalajangiisuuvoq. Nipilersortartup isertitai soorlu assersuutigalugu tusarnaartitsinernut atatillugu CD-nik tuniniaanermut imaluunniit tujuuluuqaqanik tunngasuuppat, taava isertitat ullumikkut aningaasarsiat B-tut nalunaarsorneqassagaluarput.

Nipilersortartup isertitai atorfeqarnermi inuttut sulinermi akissarsiatut inissisimappata, tamanna aningaasarsianut A-nut naatsorsuunneqassaaq, aningaasarsianit akileraartarneq pillugu Inatsisartut inatsisaanni § 75, imm. 1 takuuk. Tassani assersuutigalugu nipilersortartoq nipilersorfiusartumi imaluunniit allatut pisoqartillugu, atorfeqartitsinermi akissarsiaqarfiusumi, aalajangersimasumik atorfeqarpat.

Tassunga tullinnguullugu nipilersortartunut akissarsiat aningaasarsianit akileraarutit aamma sulisoqarnermut akitsuutip akilersinneqartarneri pillugit Namminersorlutik Oqartussat nalunaarutaat nr. 10, 20. september 2011-meersumi § 7, nr. 8 naapertorlugu aningaasarsiatut A-tut naatsorsuunneqarput. Tassunga assersuutigalugu akissarsiat imaluunniit ajunngitsorsiat, tusarnaartitsinermut peqataanermut akiliuteqartut, naak atorfeqartitsisoqanngikkaluartoq ilaapput.

Apeqquutaatillugu qanoq annertutigisumik allannguiniartoqarnersoq, taava nipilersortartut isertitaat aningaasarsiatut B-tut aatsaat inissinneqarsinnaapput nalunaarutip siuliani taaneqartup allanngortinneqarneratigut.

Tassunga atatillugu pisariaqassaaq isertitat suut, nipilersornermik suliaqartunut imaluunniit nipilersortartunut, isertitatut isigineqarnersut pillugit erseqqissumik malittarisassaqaqarnissaa aalajangersagaqarnissaalu.

Apeqquut 4 a-mut akissut:

Allannguneq nunatta karsianut isertitanik annaasaqarnermik kinguneqarsinnaavoq, kiisalu akileraarutitigut akiitsut amerlanerulersinnaapput aammalu akileraarutinik akiliisitsiniarnermut, akileraartarnikkut nakkutilliinermut aammalu akiitsunik akiliisitsiniartarnermut atatillugu allaffissornerulerneramik kinguneqarsinnaavoq.

Nunatta karsianut aammalu nunatsinni kommuninut isertitat annikilleriassapput, tassami kommunit inummut akileraarutinit isertitaasa annersaat pisarmatigut. Isertitat qanoq annertutigisumik ikileriassanersut sukumiinerusumik naatsorsorneqarsinnaanngillat, suli nipilersornermik suliaqarnermi innuttaasut isertittagaat pillugit paasissutissanik peqanngimmat.

Ikaarsaariarnermi IT-systemit pisariaqartut, najoqqutassat nutaat aammalu immersugassat, kiisalu innuttaasunut suliffeqarfinnullu najoqqutassat

allanngortiternerannut atatillugu aningaasartuuteqarnissaq aammalu nukinnik annertunerusumik atuisoqarnissaa naatsorsuutigineqartariaqarpoq.

Akilaartarnermut Aqutsisoqarfik qaqugukkut nipilersornermik suliaqarnera aammalu taamatut suliaqarnissamut piumasaqaatinik kikkut eqquutsitsinnginnersut pillugu tigussaasumik nalilersuinissaa ajornakusuussaaq. Allanguinermi amerlanerusut, nipilersortarnikkut isertitaqartut isigineqanngitsuniit, maalaaruteqartoqarnerulernissaa saqitsaannerusoqalernissaalu naatsorsuutigisariaqarpoq.

Apeqquut 4 b-mut akissut:

Namminersorlutik inuussutissarsiuteqartunut allanguineq ima kinguneqarsinnaavoq, sulisisisut ilaalu ilanngullugit qaqugukkut akissarsiat akileraaruserneqassanersut paasiuminaatsunngorlugu. Assersuutigalugu aalajangiiffigineqartariaqalissaaq qaqugukkut nipilersornermut ilinniartitsisutut sulineq imaluunniit KNR-imi aallakaatitsisutut assigisaanilu sulineq nipilersornermik sulinertut ilaatinneqassanngitsut.

Apeqquut 4 c-mut akissut:

Aningaasarsiat B-t eqqarsaatigalugit suliakkiisoq nipilersortartup akissarsiaasa akileraaruserneqarnissaannik ilanngaateqartussaangilaq. Akissarsiat aningaasarsiatut B-tut nalunaarsorneqartalissappata tamanna nipilersortartumut allaffissornerulernermik kinguneqartussaavoq, tassami nipilersortartoq nammineerluni isertitaminik nalunaaruteqartalertussaagami. Nipilersortartoq namminersorluni inuussutissarsiortuuguni, taava nipilersortartoq aningaasarsianik B-nik akiliuteqarallassaaq.

Nipilersortartup isertitaqarneranut atatillugu aningaasartuutaanut ilanngaatinik pissarsisinnaanera allanguutip kalluannigilaa. Taamaattoq, soorlu siuliani eqqaaneqareersutut, isertitaq akileraaruteqanngitsumik aningaasarsiatut B-tut 5.000 kr.-mik aningaasartaqartumut ilaavoq, tamanna allatut isertitamut atorneqarsimangippat aammalu innuttaasup isertitaasa inummut nalinginnaasumillu ilanngaat sinnerlugu isertitaqarsimangippat.

5. Nipilersortartup akilaartarneq pillugu Inatsisartut inatsisaat nr. 12, 2. november 2006-imeersumi § 24, tassanilu § 37 naapertorlugu apeqquuteqaammi 2017-174-mi allaqqasoq qanoq atorsinnaavaat?

Apeqquut 5-imut akissut:

Nipilersortartup ilanngaata atussappagu nammineq nalunaarsukkami nipilersortartoq ukiup ingerlanerani sunik suliaqarsimanerminik, isertitaminik qanoq qulakkeerinninniarnermik imaluunniit isertitaqaannarniarnarluni erseqqissarneqartariaqassaaq. Nipilersortartup aamma aningaasartuutinut ilanngaatigineqarsinnaasunut uppernarsaatit toqqortartussaavai.

Soorlu assersuutigalugu nipilersortartoq kisimiilluni tusarnaartitsinermini akissarsiaqarsimaguni, taava nipilersortartoq aningaasarsiat A-tut isertitaqarsimasutut nalunaarsuisussaavoq. Aningaasartuutit ilanngaatigineqarsinnaasut assersuutigalugu

tassaasinnaapput nipilersortartup nipilersornermi atortut nipilersorfiusumut
assartorneqarneranni atorsimasai, nipilersortartup aningaasartuutit nammineerluni
nammassimappagit.

Inussiarnersumik inuulluaqqusillunga



Asii Chemnitz Narup